

diuisorem super vos? Et Paulus ait Philip. iij. Nostra politia in coelis est. ij. Corinth. x. Arma militiae nostrae non sunt carnalia, sed potentia Deo, ad destruendas cogitationes &c. Ad hunc modum discernunt nostri vtriusque potestatis officia, & iubent vtramque honore afficere & agnoscere, vtramque Dei donum & beneficium esse.

Si quam habent Episcopi potestatem gladii, hanc non habent Episcopi ex mandato Euangelii, sed iure humano donatam a regibus & imperatoribus, ad administrationem civilem suorum bonorum. Haec interim alia functio est quam ministerium Euangelii.

Cum igitur de iuris dictione Episcoporum quaeritur, discerni debet imperium ab Ecclesiastica iuris dictione. Porro secundum Euangelium, seu vt loquuntur, de iure diuino, nulla iuris dictio competit Episcopis, vt Episcopis, hoc est, his quibus est commissum ministerium verbi & sacramentorum, nisi remittere peccata. Item, cognoscere doctrinam, & doctrinam ab Euangelio dissentientem reijcere, & impios, quorum nota est impietas, excludere a comunione Ecclesiae, sine vi humana, sed verbo. Hic necessario, & de iure diuino, debent eis Ecclesiae praestare obedientiam, iuxta illud, Qui vos audit, me audit.

Verum cum aliquid contra Euangelium docent aut statuunt, tunc habent Ecclesiae mandatum Dei, quod obedientiam prohibet, Matth. vij. Cauete a Pseudoprophetis. Gal. i. Si Angelus de caelo aliud Euangelium euangelizauerit, anathema sit. ij. Corinth. xij. Non possumus aliquid contra veritatem,

F iij sed pro